

卷之二

廣西名勝志卷之三

閩中曹學佺能始撰

平樂府 在省城南
二百里 領州一縣七

唐武德初以始安郡之平樂縣置樂州貞觀改名

昭州元大德間陞州為平樂府 大明因之○唐

李商隱昭州詩桂水春猶早昭州日正西虎當官

路闔猿上驛樓啼繩爛金沙井松乾乳洞梯鄉音

殊可駭仍有醉如泥宋梅摯云我愛昭州路優游

不嶮崎九疑通舜埜八桂遶秦祠亭埃相望處漁

樵有讓時政平無虎鬪莫信義山詩○天繪亭夷

堅志云昭州郡圃有亭名天繪建炎中郡守李不以與金國年號同欲更之乞名於徐師川久而未得有范某者爲易曰清輝已揭榜而師川來謁李視積壤中有片石斑斑如有文字取而滌之乃此亭舊紀其畧云予擇勝得此亭名以天繪取其景物自然也後某年月日當有俗子易名清輝者可爲一笑考其命名之日與此不差今亭在西山福聖寺攷亦不存○明宣德間知府唐復字永亨毘陵人嘗葺郡治建書樓于府學明倫堂復繪古勤學者以風諸生名曰昭文○西山卽昭山也距城西百步灘樂一水滙有巨石逕百尺屹立水中其石正方如印亦名印山○按灘江發源陽海自桂林府來至平樂乃名府江以昭州及平樂縣在唐宋之季俱屬桂林水經注曰孫吳割蒼梧之境立以爲縣北隸始安是也平樂至元時始得自稱府而府江之名本于此○水經注云始安谿水又西南注于灘水謂之平水志云樂水源出富川上鄉越恭城縣遶至郡城入于灘灘樂一水滙處蓄而爲潭其深莫測名曰昭潭下爲十六灘最險峻今昭潭驛沿其名又上有更鼓灘荔浦江自西南注

之曰荔浦江口舊平樂縣設此○古州城在府西南樂山里相傳隋唐時築今訛爲孤州唐中書令崔玄暉與張柬之等謀誅張昌宗奉中宗復辟後因武三思譖貶玄暉古州司馬尋遣人殺之於此○唐刺史敬超先與杜甫善甫寄高適詩序有云今海內忘形故人獨漢中王瑀昭州敬使君超先在耳城北龍興觀有敬公井尚存○明督學使蘓濬沿革論曰昭介桂梧西北近楚清湘九疑鬱相繆焉東南入梧巨石急灘如坂上走丸溪峒林樾多爲獠人所盤據一夫不靖醜類陸梁近且芟夷

而蘊崇之刊山通道展爲周行而又增置樓船繕修校壘廼令單騎直馳往來如織重裝下上帖席而安蓋千百世之利哉郡治故寥濶山田仰泉不甚作苦茹茨竹戶魚鹽粗給庶幾稱小康云○府城宋治平元年太守汪齊築至軋道乙酉歲太守葛永慶修治之議鑿後山爲壕不果 國朝洪武十三年增設守禦千戶所始拓開于外三里合之得五百四十有一丈○廢樂州城在府西南三里唐武德初刺史汪齊贇築○廢永平縣在府東北歷塘村隋開皇置宋開寶中廢○廢龍平縣在府

廣西各州志卷之三
東南百六十里梁靜州及龍平郡唐富州皆治于此今屬昭平縣思慙里

平樂縣 附郭

釋詳府下然縣自吳甘露元年分富川置則先于府久矣○鳳凰山據城東北勢如飛鳳層松千株干霄拂雲爲一方之形勝有梅公亭遺址宋景祐中龍圖梅公摯守郡時建○南山在昭潭南岸雙峯挺出峯下有巖深廣數丈資聖寺設焉○東山距城一里多竹木宋嘉祐中里人太子中舍韓廻澹于仕進隱焉號東山野叟轉運李師中有詩題

其隱所○仙宮嶺在府城北宋元符間鄒浩謫居以江水不可飲汲於數里外後所居嶺下忽有泉湧出因名感應自銘之曰有穹其山有澄其淵動惟厥時以出斯泉沛然莫遏其源我感我應其來自天及將北歸數日前泉乃涸浩使人濬之乃於亂石下得蟹一枚自放於江曰予至五嶺不見此物數年矣亂石之下又非所宜穴也何從而出耶易不云乎物不可以終難故受之以解蟹者解也天寔告之矣是夜有人至門厲聲呼曰侍郎歸矣求之不見次日果獲賜環○徐師川集有訪鄒道

鄉故居詩序云十一月九日携一豎子邀單秀才步出古觀之西北求鄒侍郎忠公寓舍於拾青閣故基其詩云履霜頗強健晨興恣所適兩兒休藍輿呼客同蠟屐危橋出隘巷憑高聊物色蒿然但林莽蕪廢長荆棘井竈那復遺江山依舊碧要知千載下懷賢求所歷按師川名俯黃魯直之甥也魯直謫宜州師川來訪舅氏魯直卒俯寓昭州者久之○道鄉書院舊碑 國朝嘉靖丁未歲縣令李圭于道中得井欄一面滌其泥穢有字漸露乃斷碑也遂徧求之更得數片惜不能成章乃爲置之

之學宮其詩曰道鄉書院久銷沈誰憶殘碑此日尋夫爲忠賢留勝跡人于夢寐感知音貞珉宵逐風霜變妙畫元非鬼物侵讀罷益增今昔感斗山應借重儒林□忠公同時有元光者昭平人嘗從公遊公亦至其家及放歸有詩別光云不因投鼠聊見宰官身周顒尚以家爲累元亮惟知酒是真莫逆于心更何語撥開船子過醪津○肴山在城東南九里峯巒秀聳宛如肴黛故名又里許爲縈山山有九峯縈紆曲折莫窮其致○白雲巖在城

東十里叢林蒼蔚洞門翼然有古藤盤繞之其中
寥廓盛夏常寒成聲肖象之屬甚夥○華蓋山在
城西十里夕陽返照有似火焰 國初解縉詩云
火焰山危下夕陽卽此山也○密山在城北十里
群峯迴合環擁郡治故名近城五里有龍嶽峯宋
鄒忠公得志軒云前有峯數十仞曰龍嶽卽此一
名龍躍考槃之水出焉跨澗有橋曰覽勝○聖山
穿山誕山俱在縣東北樂山里聖山者以譚氏二
仙女尸解于此而名巍峩挿天絕頂高平俗呼仙
殿石前有梳粧臺左右列翠竹二枝仙子將飛騰
清風徐來踈篁拂座爽氣瀟然○穿山三峯並立
半壁開一圓竅可通往來○誕山亦有三峯譚氏
二女產此山下及長脩黃老之術不知所之一日
里人以不雨爲憂二女至謂之曰汝能餉我卽可
得雨翁第餉之未信也二女甫去果大雨如注翁
知其神追覓不見山下呼之則上應山上呼之則
下應循至一巨石四周無草木二女之衣帶在焉
翁異之白其事於衆是後恒見二女於石上櫛髮
因建廟山下祀焉○後唐陶英字世民世爲青州
人累官太尉天祐二年上書言事指斥時政忤朱

全忠因授太尉征南將軍領兵八萬出鎮昭州故以疎之明年全忠篡位英懼禍隱于誕山家馬同時有李太尉者簪纓相似子孫累代締姻其山下有峒因目為陶李峒○誕山之水北流至榕津與沙江合即故沙亭縣也其上有走馬坪○縣之津平里在虎步江口有廢茶城縣址其上有日巖高數十丈下有巨石近頂左右有兩小巖宛如人目黑白分明見荊州風土記

賀縣

在府東二百八十里

本秦臨賀縣二國吳以為郡隋平陳改置州唐宋

如之臨賀者為治所 國朝省臨賀入州後又改

州為縣宋之省封陽蕩山元之省桂嶺皆析臨賀

置者今為桂嶺蕩山等鄉○按桂嶺一名臨賀漢

書張耳傳秦有五嶺之戍廣州記大庾始安臨賀

桂陽揭陽謂之五嶺是也盛弘之荊州記云臨賀

山中有二竹大數十圍有盤石徑四五丈清滑如

棋局二竹屈垂拂掃石上絕無塵穢未至數十里

風吹竹音如笙簫臨水出馬流合賀水元和郡縣

志云臨水一名賀水源出富川節此水也臨賀水

逕龍門灘水深百尋大魚自躍登此門化為龍不

過者曝腮點額右在縣東南一名龍谿○浮山在縣東十里挺出江中雖洪濤汎漲此山不沒上有迎碧亭○甌山在縣西十里高千餘丈舊名幽山唐刺史李郃來遊名瑞雲宋守鄧璧以此山多雲氣因改今名其上有泉注爲池名曰仙池○仙池之水流入橘江以注于賀而玉山泉天堂嶺之水皆注焉按王泉山在縣西北天堂嶺在縣南各去十里其泉皎潔四時不絕縣北二十里有七十二峯攢竒競秀其中多橘是曰橘山乃橘水之源也唐時有銅冶今廢○按莫休符風土記云天師舊宅在賀州道錄以爲玄中大法師今以宅爲廟廟中有美異果實往來人食之無患惟勿採取取必致禍○唐書李郃列傳郃字子玄延唐人因劉蕡對策切直爲時宰所抑郃與裴休杜牧等二十二人中第郃曰劉蕡下第我輩登科能無厚顏疏言蕡策漢魏以來無與比臣對不及蕡遠甚乞回所授以旌蕡直不報爲賀州刺史賀人愛之至改甌山曰瑞雲云其時咸通間宰相常保衡出爲賀州刺史畱意吏事不以舊宰輔自居人亦稱之○宋大中祥符時道州人周輔成舉進士授賀州桂嶺

令終其官以子敦頤貴贈諫議大夫○文獻通攷

有本政書十三卷南軒張栻答朱元晦柬云賀州

林勳本政書想亦須見其人一生用功于是持論

亦可貴又于其家求得數書有論屯田項目亦具

有功今給抄錄續當奉寄敬夫時為靜江府帥云

○通志啓聖紀云孝穆皇太后 孝宗皇帝母賀

縣人幼入宮成化五年 憲廟召幸有娠萬貴姬

知而惡之百方苦楚胎竟無恙 上令託疾出居

安樂堂以疝報而屬門官嘗視六年七月己卯誕

皇太子是為孝宗皇帝太后少乳太監張敏使女

侍以粉餌哺彌月西內廢后吳氏保護之尤謹已

而悼恭太子薨萬貴姬無子禁中漸傳西宮有皇

子 上與貴姬始召見相持泣下於時皇子六歲

矣矩度不凡上撫之大喜徙 太后永壽宮叵何

暴卒京師籍籍有異言追封淑妃二十三年 憲

廟崩 孝宗卽位尊謚孝穆皇太后有縣丞徐瑱

者請究 太后崩逝之由禮部以為且輿太獄株

連蔓引非 先帝意從之但訪求 太后親屬之

在廣西者紛紛良久竟無所得或云 太后李姓

入宮時誤稱為紀又以為太后家在賀之迎恩里

白龍塘毋孕 孝穆將免忽一日龍塘水盡赤已而 孝穆生云

荔浦縣

在府治西八十五里

本漢舊縣屬蒼梧在荔江北因以爲名唐以縣置荔州尋廢宋以永寧縣省入○鵝翎山在縣東五里巖壑相承虛明變幻中有巨石如鵝故名或云娥英語音相近宋甘叔異詩俗謂鵝翎未便然娥英恐是古時傳谿聲流盡蒼梧淚斑竹林中聞杜鵑○卧山郡國志云荔浦有卧石其形似人而舉體青黃隱起可以祈雨小舉小雨大舉大雨○荔江源出崇仁縣荔山今入永福界輿地記云荔溪多桂不生雜木樵採皆桂有丹竹江出峯門瀨水出魯山其流皆入焉○鑛鋤山在縣北四十里險峻如升昔人置關其上卽漢地里志之荔平關也土名界牌峽○水經曰瀨水南過蒼梧荔浦縣註云瀨水出縣西北魯山之東逕其縣西與濡水合出永豐縣西北濡山東南逕其縣西又東南流入于荔浦縣注于瀨谿又注于瀨水之上有瀨水關瀨水又南左合靈谿水口出臨賀富川縣北符靈岡南流逕其縣東又南注于瀨水○徐徵字君求

蒼梧荔浦人漢延熹中仕郡為督郵適中常侍唐
 衡遣客至蒼梧買珍奇客怙衡勢多臧所直又淫
 酗過甚徵便收客郡市髡笞已乃白太守太守大
 怒收徵付獄主簿請曰此人無禮恃強買賣既侵
 百姓又汚婦女徵上念明政據刑申耻今不使佐
 郡無復爪牙之吏後督郵當徒跣行奉諸貴戚
 賓客耳太守不得已釋之郡中稱其敢決○宋梁
 弼高要人調靖江荔浦尉以獲賊功改官僉書鬱
 林一日假寐夢西海府君牒請云殿庭如王居講
 賓王禮請梁撰水城記梁援筆為之記未就而覺
 明日錄畢焚之無病而逝

富川縣

在府東北一百六十里

富江源出靈亭鄉南滙神源之水注於賀以入灘
 此縣命名之始也兩漢蒼梧郡下有富川縣唐天
 寶初更名富水縣尋復舊宋省馮乘縣入元及
 我明如之○按漢書有萌渚嶠為五嶺一與湖廣
 江華縣分界廢馮乘縣基在焉今屬富川賀縣之
 間晉陶侃之擊杜弘宋潘美之擊劉鋹岳飛之擊
 曹成皆由於此○漢地里志元鼎四年析臨賀鐘
 山地置富川縣今鐘山千戶所是去縣西南六十

里山上有石扣之如鐘鳴故曰鐘山也其後徙霽石山霽石者四時常有煙靄冒於峰頂又里許曰興雲山雲蔚卽雨人以其爲候矣今治乃洪武初征南將軍韓觀所遷○朝冠山在縣東一里以形似之或謂朝陽之冠冕也又九里爲穿山其上有巖石皆五色蒼藤數根從下繞之又石梁可逕而度故以穿名○石門山在縣東三十里四圍峭壁僅容一人入其中則平原曠野居民百餘家不減桃源○秀峯在縣北二十五里平地突起凡數十仞秀甲雲表唐開元間浙人毛裛爲賀州守之後道經此峯欣然歎曰歸閒之日于此卜居焉及卒于官家因不返其次子曰亨曰貞卽富川毛氏祖也又十里爲桃母崑谿水漫流傍多桃樹相傳有老嫗歲凶種此采其實以充饑樹畱至今特盛又十里爲龍山龍谿之水出焉遶郎山下過石巖多穿內有鐫刻又二十里爲長標嶺耆老相傳唐李靖討蕭銑時駐師植標于此○白馬山在縣南二十里其下有白馬泉又六十里爲碧雲洞洞門石脉隱起廣陽島三字遠極分明近視如擘絮狀○歌山在縣東南郡國志云昔有老人自少不婚而

善謳及病將死隣人送之此山老人歌以爲別餘音數月不斷○犀泉在縣東北泉藏坎中坎在平地深約丈許長不下三四丈橫可七八尺上覆綠樹下列蒼崖始至見之坎石甚乾人呼則出不移時水滿涸亦可待冬夏呼之水至皆然其靈異如此○神仙傳云漢張陵在富川丹竈山煉丹脩道晉永和九年九月九日登白霞山飛昇丹竈藥臼猶存按在縣西南一百二十里今白霞口○五代莫公失其名號爽朗道人居富川七歲辭母入石巖中日跏趺靜坐人莫窺其所爲每相率伺於巖外一夕俄不見以爲狎舉云按在縣東六十里隱山其中有潛德巖鐫林公石牀四字宋元豐二年林通達夫識○秦山在縣北一百八十里荊州記云吳孫權時此山夜雷暴震開爲洞者六有石鼓石壇昔傳仙人所居○志云林楚才有詩名與清湘唐仁杰同時倡和毛奎字子文性寡嗜好力學不倦建書院以授生徒自號澹然居士嘗作大小二洞天記已上俱富川人

恭城縣

在府西北一百里

本漢蒼梧郡地唐武德四年析置○燕子巖在縣

南里許外峻頂寬有石巖如燕巢然○金芝之巖在縣東三里石室高朗乳垂如芝○穿巖在縣西十五里巖至深邃有谿源從中出舟行如在月中爽氣逼人○銀殿山在縣東北八十里元和志云其下有鐘乳穴十二所是以山際明白如銀或云常有白雲繚繞遠視如宮殿故名○平島山在水西方輿勝覽云唐葉靖祖墓在此靖有道術嘗與明皇乘雲幸陳湄堂家每歲上必來省墓去墓十里有大悲寺元豐初有客葉姓者借宿於寺因口占詩八句僧但記其結句云明朝蓬島去白雪滿頭飛詰旦啓戶人馬遽失○周渭恭城人南漢時苦于繁賦因率鄉人踰嶺將避地零陵爲賊所得脫身走建隆初至京師見宋太祖上書時務太祖竒之擢右贊善大夫歷試郡縣政以簡肅太平興國二年遷廣南轉運副使初渭入中原妻子皆留恭城及廣南平渭始還鄉里因奏去劉鋹無藝之征鄉人德之爲立祠焉○國初蕭嘉祐新會人知恭城縣推情與民民皆感悅山谷徭氓以片紙招之依期而至無有後者聽政之暇與諸生講學士風丕振

脩仁縣 在府治西八十五里

本漢荔浦縣地吳孫氏置建陵縣梁武帝立為郡
 隋開皇郡廢仍為縣唐長慶三年桂管觀察使殷
 侑奏縣名同肅宗陵號以縣有脩仁鄉請改脩仁
 相沿至今○羅仁山在縣東二里又六里為太平
 巖又二十里為青山○橫水山在縣西一里又九
 里為越王山又五里為駱駝山下有駱駝水源出
 龐山西南流注連水○縣之東陂水出晨口朝陽
 水出平南皆入于荔以注灘江○縣北十里蘓山
 宋皇祐間知縣狄道誨討山寇經此夢蘓子卿神
 來棲因禱焉師捷請于朝即其處建廟祀之賜額
 順應因名山曰蘓山廟前有樹一株 國朝弘治
 知縣葉某將伐之轟然有聲猛虎隨至乃思而止

昭平縣 在府治南一百八十里

本漢蒼梧郡臨賀縣地武帝分臨賀郡於龍平縣
 置南靜州開皇十一年廢以龍平屬桂州貞觀八
 年於此置富州縣亦屬焉宋開寶五年廢富州以
 思勤馬江二縣入龍平隸昭州宣和六年改為昭
 平元復為龍平尋省入平樂 我朝萬曆四年復
 置仍名昭平○靖尉山在縣南二里舊經云唐開

元中明皇從法師葉靖乘雲幸此山山有御座基
又幸前進士陳蒲堂家未幾其家生金筍蒲堂尋
亦不知所往○玉白泉在縣西北十里龍門峽左
宋治平間刻龍門玉白泉六字○木皮山在縣東
二十里又二十里爲芟葉山又四十里爲北陀山
○獨山在縣北一百二十里巍然特立周圍皆峭
壁不可躋南一穴深三十步廣二十六步高千尋
可通山巔寇起居民緣梯而上下視以石擊之寇
不敢犯○五指山在縣東一百八十里其中深廣
入僅一線可容一人扼之則萬夫莫過○宋時有
翁宏者字大舉寓昭賀間不仕工詩送人下峽云
萬木殘秋裏孤舟伴夜損南越行云因尋買珠客
誤入射猿家細雨云何處殘春夜和花落古宮途
中逢故人云孤舟半夜雨上國十年心衡山處士
廖融南遊宏贈以詩云孤吟半渚月老憶洞庭山
皆稱佳句

永安州

在府城南一
百六十里

本漢荔浦縣地元和志云武德五年置立山縣又
於此置南恭州貞觀八年改爲蒙州宋會要云熙
寧八年廢蒙州以立山縣屬昭州省東區蒙山二

縣入焉 我朝置永安州屬平樂府○方輿勝覽云三石在城南十里僞漢時有兵入靖江過此黎明遇獵者牽黃犬逐一鹿兵以鎗刺鹿徐視之石也已而人犬與鹿皆化爲石鼎峙道傍今一石尚有鎗痕○蒙山在城東五十里唐蒙州蒙山郡治所其名亦取焉○通天嶺在州北三十里相傳昔立山縣人夜卧山巔至夜半嶺忽高及天其人頓覺以手摩之歸白縣令往驗果然因發民丁周圍鑿窟數十穴實薪燒之如龍吟者數日乃絕遂不復高其穴猶存○銀江在州東源出平峒逕上龍漚于西江西江源出茶山在州之西故名○激江在州南源出古眉東至于藤南入于海○金麻江在州北源出榕峒過山灣會古東古爽入于灘

廣西名勝志卷之四

閩中曹學佺能始撰

梧州府

在省城東南七百里

領州一縣十

漢地里志蒼梧越地秦始皇取百越以屬桂林郡秦末趙佗自立爲南越王封其同姓趙光爲蒼梧王卽此漢平呂嘉以其地爲蒼梧郡之廣信縣因於郡兼置交州元封五年置十三州刺史於禹貢九州之外交州刺史部七郡蒼梧其一而交州仍治廣信後漢獻帝末孫權以步騭爲交州刺史始遷州於番禺孫皓時分置廣州理番禺而交州乃

徙龍編矣晉宋齊梁陳蒼梧為郡不改至隋始廢
唐平蕭銑置梧州天寶元年改蒼梧郡乾元元年
復為梧州宋因之元改梧州路 我明設府○史

記帝舜南巡崩于蒼梧之野山海經曰蒼梧之山
帝舜葬于其陽丹朱葬于其陰文穎注漢書以為
九疑之山半在零陵半在蒼梧也魏澹引玄中記

云堯時有何侯者隱蒼梧山至夏禹已二百餘歲
五帝賜之藥一器家人三百餘口同昇今為太極
真人按此則蒼梧已著名于上古者矣○羅弘荊

州長沙人漢元封五年初置交趾部刺史弘入蒼
梧春行冬息徧歷所部咨詢疾苦太守而下多解
綬請罪弘廉實舉發一時貪殘為之斂迹部內肅
然○喻猛和帝時為蒼梧太守以清白率吏郡人

頌曰於維蒼梧交趾之域大漢惟宗達以仁德○
賈琮字孟堅東郡聊城人靈帝授交州刺史時交
趾屯兵反執刺史及合浦太守琮到部訊其反狀

咸言賦稅過重百姓家殫民不聊生故聚為盜賊
琮即移書告示各使安其資業誅斬渠帥為大害
者簡選良吏試守諸縣蠲復徭役百姓底定巷路

歌曰賈父來晚使我先反今見清平吏不敢飯○

陳臨字子然南海人漢永建中為蒼梧太守推誠而理道人以孝悌民有遺腹子為父報怨殺人被吏所獲臨知其無嗣令其妻侍獄後產一男郡人歌曰蒼梧府君恩廣大能令死囚有後代建安中徵為廷尉後本郡以五月五日祠臨東城門上令小童縲服以舞之○圖經云朱臨水在郡城南後漢郡守陳穉升郡事暇時釣魚于此○朝臺岡在城北六朝范曄築臺山上遇正朔輒率群僚望朝而拜○梧州有總府其右為總督制府而總兵府在總府之東北謂之西府故事元戎乃勳侯也嶠

南瑣記云舊府中有伏波將軍所鑄銅鼓其一尚存形不似今制深三尺許面徑可三尺五寸旁圍漸縮如腰形復微展而稍弁其口似今之竹焙篝體絕薄純綠色紋甚精古面環遶作鼉龜十數昂首如欲跳狀中受擊處亦平但畧厚如鏡耳已有斷裂痕擊之聲不甚發聞一完好者近為稅璫獻之內庭所縣木架尚存堂之左右有銅鑄狼機數柄倒柱地製亦精必非近時物也又聞蒼梧郡有銅船沈于水至今天霽水澄隱隱可見謂是伏波所鑄按後漢書永和間周敞為交州刺史採龍山

之木爲州門鼓仍分一鼓給桂林郡一鼓給交趾郡擊一鼓則二鼓皆鳴所謂叩宮而商應者也其形亦倣銅鼓之製大抵夷人重約誓信鬼神故多作此類以鎮服之耳○儒林傳後漢劉熙字成國北海人博覽多識名重州黨建安中薦辟不就避地交州往來蒼梧容授生徒數百人乃卽物名以釋義惟揆事原致意精微作釋名二十七篇熙自爲序其時有程秉字德樞南頓人少明周易詩書逮事鄭玄得其奧秘後避亂交州與熙考論大義遂博通五經士燮命爲長史孫權聞之以禮徵辟拜太子太傅後卒于官所著周易謫尚書駿論語芻凡三萬餘言又有薛綜字敬文沛郡竹邑人世典州郡爲著姓綜少明經善屬文舉秀才漢末大亂乃依故人避地交州從劉熙學士燮旣附孫權召綜爲五官中郎除合浦太守治郡威惠並行民獠愛之轉守交趾時交土始開刺史呂岱率師討伐綜與俱行事畢還都守謁者僕射赤烏三年徙左部督尋爲選曹尚書太子太傅六年春卒所著詩文名曰私載○西事珥云後漢永平間陳元長孫以布衣伏闕疏稱范升等所駁左氏義皆斷截

小文嫖黷微辭抉瑕摘釁掩其弘美請復立左氏
學上從之元厭難將軍欽之子欽治左氏與劉歆
同時而各自爲家三輔決錄謂左氏春秋遠在蒼
梧蓋指欽也元子堅卿亦以左氏顯若此則遐陬
素士能用經術崛起固不必借光于寓賢矣○牟
子者蒼梧人其自叙曰靈帝崩天下擾亂獨交州
差安北方異人咸來茲土多爲神仙辟穀長生之
術時人多有學者牟子常以五經難之道家術士
莫敢對是時牟子將母避世交趾年二十六歸蒼
梧娶妻太守聞其守學謁請署吏牟子見世亂無
仕宦意竟不就州牧辟之復稱疾不起牧弟豫章
太守爲中郎將竿融所殺牧乃請牟子曰弟爲逆
賊所害骨肉之痛憤發肝心當遣劉都尉行恐外
界疑難行人不通君文武兼備有專對才今欲相
屈之零陵桂陽假塗于通路何如牟子曰被秣服
櫪見遇日久烈士忘身期必騁效遂嚴當發會其
母倖亡不果行久之歎曰老子絕聖棄智脩身保
真萬物不干其志天下不易其樂故可貴也于是
銳志于佛道兼研老子五千文含玄妙爲酒漿翫
五經爲琴簧遂乘筆墨餘閒畧引聖賢雅言證解

之名曰牟子理惑云

蒼梧縣 附郭

漢蒼梧郡之廣信縣亦郡所理也隋始設蒼梧縣
縣南十五里與封川界屬廣東有兩廣樹在封梧
之間南北兩柯驗其榮瘁以上兩省之豐凶○唐
盧綸寄嶺外故人見說南來處蒼梧接桂林過秋
天更煖邊海日長陰巴路緣雲出蠻鄉入洞深信
憑人自說夢到月應沈碧水通春色青山寄遠心
炎方難久客爲爾一霑襟明解縉詩蒼梧城北繫
龍洲水接南天日夜流水井鰐池春草合火山鮫
室夜光浮千家竹屋臨沙嘴萬斛江船下石頭歌
枕夢回霄漢近珮聲猶在鳳凰樓○按志繫龍洲
在城東七里大江中亦名七里洲江水巨漲洲獨
不沒故謂之繫龍洲□水井在城東水井寺內其
水澄湛不涸味甘且冷唐經畧使元結目之爲永
井又爲銘刻石上其前有浣清堂今廢□鰐池一
名思良江在城北二十里亦名多賢水其中鰐魚
有四足長者二丈恒在山間伺鹿亦能啖人攷搜
神記稱扶南王范尋養數虎於大雲山以罪人投
之無罪者虎不食乃赦之又於池養鱷魚十數頭

授之如大雲法學士解公似用此事□大雲山在城東北隅有伏虎巖蟠結危聳卽范養虎處今授虎之事寂然乃有三界廟者廟中小蛇十數背青腹赤目有火光常緣神身及蟠繞藤香上人以手接而玩之甚馴習往來莫知其嚮有祈願越期未賽者蛇輒至其家人驚曰神索願也友人鄭紱偕予至梧渡江祀之果然廟在火山之麓○寧宇記云火山府城南隔江山下水深無極山上有火每三五夜一見如野燒或言其下水中有寶珠光燭於上或言南越王尉陀藏神劍於此故騰焰如火山有荔枝四月先熟吾閩稱火山荔枝本此又產獸名靈麋生三足郡中有災福及使車將至則先鳴唐沈佺期詩身經火山熱顏入瘴江銷虞衡志云嘉魚在火山下丙穴中狀如小鱗魚味極美春末尤佳○三江以左右二江合府江滙于城南故名府江一名桂江卽灘水也水經注曰鬱水又逕蒼梧廣信縣灘水注之又東逕番禺入海是矣漢武帝使馳義侯發夜郎兵下牂牁江會番禺卽此也水傍有石英山宋產石英克首英山之左有鶴飛岡相傳南漢太守劉曜嘗鑿斷之俄有雙鶴飛

逝于上又城北六十里有通星山亦傳曜所鑿以觀星象者○金石山在城東二里圖經云吳時有道士牽牛渡江語舟人曰船內牛糞聊以相酌舟人視之牛糞皆金須臾道士與牛並隱石下○石鼓洞在城西北五里山巔有洞洞下爲慶林寺其左臨江爲高明亭故址○蘓山在城東南八里大江之滸相傳宋蘓軾被謫南行泊舟於此山下故名○立山在城西十五里東臨大江山坡平行西極險隘一徑通藤○印山在城西北三十里其形正方如印特立水塘中塘曰大印塘○城家記云

農城縣在治西南晉置劉宋時廢郡國志云縣有銅山銅湖銅丘○戎城縣亦晉置宋咸平省人以地置戎墟鎮○歌羅城在治西南六十里隋開皇李賢築以屯兵者○漢孝子丁密墓在縣內密遭父喪廬于墓側有雙鳧游密舍傍小池見人馴伏後遭母喪復廬墓二年雙鳧游戲池中亦如之全時有頓琦者母喪獨身造墳歷年乃成手種松樹成行感飛鳧白鳩之瑞南史范雲爲刺史遣使祭密及琦墓是也○唐吳武陵墓在城內桂芳橋石刻唐咸通二年立○朗吟亭在城東跨濠通放生

池舊名飛仙以昔有神仙朗吟其上○武寧龜渡在
通運所前桂江之側○戎墟渡在城南二十里大
江上通長洲卽宋戎墟鎮○五兩渡在縣東二十
里本唐詩惡說南風五兩輕之句

藤縣 在府西六十里

本漢蒼梧郡之猛陵縣地晉置永平郡於此隋廢
郡置藤州唐天寶初改感義郡乾元初復為藤州
治寧風縣宋徙治鍾津縣元因之我 洪武十一
年改州為縣省鍾津入焉○唐宋之間發藤州詩
朝夕苦過征孤魂常自驚泛舟依島泊校館聽猿

鳴石髮綠溪長林衣拂地輕雲峰刻不似苔壁畫
難成露浥千花氣泉和萬籟聲攀幽紅處歇躋險
綠中行戀結芝蘭砌悲纏松栢瑩丹心江北死白
髮嶺南生魑魅天邊國窮愁海外情勞歌意無限
冷月為誰明○東山在縣東一里上有李衛公祠
以公南征嘗駐師於此○南山在縣南二里頂平
如砥上有杏壇松崖竹巷芹澗皆清絕勝地附近
為石壁山巖巒相倚松檜倒生其下卽大江也又
有石人山危石臨潭遠望如人○龍驤山在縣南
七里數峯聳列下俯清流晉龍驤將軍陳隱鎮此

嘗駐兵山下故名○登嶼山在縣西十五里二山
南北對峙江中蒼翠相望溢於眉睫○六爻山在
縣西九十里山形交加如列成卦○赤水峽在縣
東六十里峽南有巖深濶丈餘頂竅通日光相傳
李白嘗過此因名李白巖峽與巖相對壁立而一
水中流舊有廣惠寺今置巡司其上○白藤嶺在
縣西南一百里路通容縣多產白藤今昔州縣俱
以此名○藤江在縣北源出交趾至邕州左右江
至此與繡江合又東流至番禺入海蘓子瞻詩繫
舟藤城下弄月鐔江濱江月夜夜好雲山朝朝新
按宋紹聖間黃門蘓轍責授化州別駕其兄軾亦
徙儋州相遇於藤作詩倡和卽此處也○鐔江在
縣東南自高州北流徑容縣至縣城東入於黔鬱
唐武德初有宣撫使者至此艤舟遊慈聖寺以金
杯挹井水杯墜井中汲水至乾不見杯只得一龜
長一尺二寸宣撫解紅勒帛繫其腰放之井祝曰
爾若有靈當漲杯出水及歸至寺門塘見龜踴躍
塘內次日遊乾亨寺道忽見前杯自澗流出又見
前龜紅帛仍繫於腰又拾龜而放之曰爾若有靈
同歸供養是夜風浪忽起宣撫舟中有一寶劍浮

水而去明日集網窮搜不見但得古藤一根而埋之乃至西岸又見龜跡環繞及奏改移鸞州於此仍依龜跡築城名其地曰鐔津且於寶劍躍水處名劍江○注王泉在縣西南宋秦觀詩中有涵雲注王之句故名元余觀詩雲蒸崑山液月浸藍田英臨風燕沆瀣滿腹珠璣鳴○桂山泉在縣東二里色白味甘余觀詩寒蟾窺玉甃老兔遺香酥化為銀河水一沃炎海枯○鴨兒灘在縣南三里富禮詩云秋高霜降餘灘淺石齒齒漁郎吹笛來野鴨斜飛起山頭兩石人並坐如笑指○金環灘在

峽內唐武德初有於藤州得馴鵲者能言語歌舞獻之內庭歲餘不語恠而問之答曰身居南土生長禽中父母異方故不敢言上憐之賜以金環而遣之歸因以是名○揚州托州俱在縣東繡江上居民鱗錯○秦觀題藤州光善亭詩霞通海天曙月來東山白共是凭欄人誰足當秋色相傳觀在藤嘗夢中作辭云山露添花花動一山春色行到水溪深處有黃鸝千百飛雲當面化龍蛇夭矯掛晴碧醉卧古藤陰下杳不知南北時觀已病是日偶爲客述之因索水水至不能飲笑視之而卒

容縣 在府西二百四十里

本漢合浦縣地晉分立巖昌縣梁改曰陰石縣因立陰石郡隋廢郡改縣曰奉化又改曰普寧屬藤州唐武德四年平蕭銑置銅州貞觀八年改容州以容江為名宋元如之我 朝改縣○唐曹唐逸巖大夫再領容州日照雙旌射火山笑迎賓從却南還風雲暗發鏡歌外號令潛生氣槩間簞竹水翻臺榭濕刺桐花落管絃閒無因得報真珠履親從新侯定八蠻○大曆間元結為容管經畧使植蓮于解後池構亭曰面面以其四周爽豁可矚蓮

花而名□相傳蓮塘內有銅鍋一口每風雨夜與譙樓禁鐘相搏鐘蓋唐貞元間物也當事者屢欲徙之他處皆不克達若還之極用其力之半○濯纓亭在城西三里繡江上有石橫江枕流上平如砥可坐數人石罅如紫玉尊受水數斗次山亦名之為霍尊其水色似滄浪故以濯纓名○城南江即容江也一名繡江有駱駝橋跨之唐貞觀二年建學于此至元始遷江源出北流藍山經縣城南東流入藤梧○距城十里有讀書臺巨石蟠江上如砥昔漁人繫舟夜宿其澣聞石上朗誦書聲故

名○北靈山在縣北二里其狀似龜亦名真武嶺
又八里爲陵雲山勢高入雲上產斑竹○西山嶺
在縣西二十里嶺斜而長聯絡不斷迤北卽大容
山○大容山在縣西北二十五里高五百丈周圍
一千餘里鬱林高潯諸州分據其麓○都嶠山在
縣南二十里山有八峰曰兜子馬鞍八疊雲蓋香
鑪仙人中峰丹竈而八疊最奇秀有南北兩洞道
書第二十洞天南洞寬廣平坦中有浮屠大像北
洞差狹爲星壇者八中峰絕頂有室曰中宮院宋
隆興中有梁賢者與友人遊此見有閣宇三間傍

多梅林取一顆啗之自是遂不粒食蕪東坡贈邵
道士詩乞得紛紛擾擾身結茅都嶠與仙鄰卽此
○楊山在縣西雲凌里唐楊貴妃產於此有井尚
存曰楊妃井妃小名玉環父亡母葉氏懷孕十三
月而生妃後軍都督部署楊康以財帛求之爲女
三歲聽康親女讀書卽能成誦時有長史楊玄琰
攝行帥聞之遂倍金帛與康得之選入壽王宮明
皇召入內爲貴妃號曰太真○龍母墳在縣南二
百里白花村沿澗而入層崖濺瀑飛下數十丈瀑
之左群峰盤竦稍夷處儼成一月堂龍母墳在焉

東偏有小石池容水數斗石壁如削下臨急湍不能容步衆流奔瀉百數十尺乃滙爲深潭渟泓莫測龍蓋蟄伏于此初猶人婦入山中久不返衆往覓之則爲龍所據陰雲罩幕旣歸所居常有寒氣人莫敢近婦不自覺也娠歲餘產一龍胞中無血止下水數升頃之雲霧交集騰舉而去婦亦無恙後數歲婦以病死方殯忽有龍自空中下盤旋蜿蜒數四遂擁其骸以去衆隨之至其地石忽自裂龍寘骸陷而入焉石復合後龍常至其家飛繞屋前久之乃去○唐王翊字宏肱大曆中爲容管經畧使初夷獠梁崇寧等煽亂據其城前後經畧使皆僞治梧矧曰我容州刺史安可容他所必得容乃止出私財募士有功者許署吏于是人人自奮不數月斬賊帥歐陽珪悉復容州故地詔徙治順州○戴叔倫貞元初爲容管經畧使綏徠夷落威名播聞德宗嘗賦中和節詩遣使者寵賜之其時有常丹爲容州刺史教民耕織禁止惰遊始城州十二里開置屯田二十四所○宋王次翁知容州賊不犯境嘗慕元結之爲人恥結在道州時乞免科率二奏刻之石并其遺像以自觀省曰庶不墜

元子之政也○元封履孫字道坦至順間進士嘗
任清水司巡簡致仕日寄情詩酒淹貫百家所著
有容州人物記○國朝彭清錢塘人永樂進士知
容縣事撰次邑志三閱月而成在公之暇發爲詩
歌綽有風致

岑溪縣

在府西南二
百九十里

本漢蒼梧郡猛陵縣地陳置永業郡於此隋罷郡
置永業縣唐武德五年分置龍城縣仍置南義州
貞觀五年徙治岑溪宋太宗時避御名改南儀州
熙寧五年州廢以縣屬藤州 國朝改今屬○高

城山蟠結縣南勢競高遠土人以爲石人嶺有巨
石如人立狀○鳥峽山在縣北十里壁峻千仞縣
治是憑舊有鳥峽巡司今改上里河村去縣四十
里○丁蘭山在縣東十里有丁蘭村爲漢孝子丁
蘭故居或云孝子丁密非蘭也一名丁郎山其下
有泉名孝感泉密字靖公詳蒼梧下○都盤山在
縣南二十里一名羅山○冷水山佛子山並在縣
西南三十里兩山相接如翼之張縣以爲輔○要
峩山在城東一百里崢嶸秀特又名秀峰卽繡江
之源也縣南有皇華江縣西有潘洞江俱出連城

廣西各州志卷之四
五
鄉經縣前西流入于繡江下藤峽入梧○孫吳虞
翻字仲翔會稽餘姚人爲騎都尉數直諫吳主權
不悅權與張昭論及神仙翻指昭曰彼皆死人而
語神仙世豈有仙人也權積怒非一徙翻交州復
徙蒼梧猛陵嘗云自恨疏節骨體不媚犯上獲罪
當長沒海隅生無可與語死以青蠅爲弔客使天
下一人知己者足以不恨雖處罪放而講學不倦
門徒常數百人在南十餘年卒○晉勾漏令葛洪
在縣東六里山脩煉有棋盤石澗流涓涓入石竅
中因名葛仙巖相去里許有石穴出泉其列名葛
井昔題巖壁上詩云古洞門深百尺寬石巖題詠
暗苔斑細尋仙令燒丹去滿地流泉浸月寒

懷集縣

在府東北一百五十里

漢四會縣地晉懷化縣隋改懷集西南有懷溪合
馬寧花地諸水經廣州入海其南峰有釣臺石臨
溪水色澄泓時出白魚游泳可見按懷谿發源齊
嶽山在縣西北一百里峭拔出於衆山之上望如
嶽齊故名○天馬山在縣南五里唐地理志驃山
疑卽此○四門巖在縣西五十里突起平地中有
石室外有四門巖中石乳凝結爲柱者八爲蓮花

者一此巖之東北又有遊仙巖巖中化龍石一石
人一西南有三潮巖巖中有泉應潮輒湧○朝巖
在縣西八十里徑窄而暗其中明徹滴乳凝結為
珠玉纓絡鳥獸龍蛇之類甚多此巖西南又有燕
巖石峰峭拔入洞深邃中有石僧芝菌其局以多
蟄燕于此故名○梅子山在縣東一百里中多梅
樹掩映成林○白崖山在縣西南百五十里山嶺
險峻白石楚楚望之如雪故名○廢懷遠縣晉置
在城東十里今立古縣營是也○廢威州唐置領
懷集永固泅水三縣尋廢今縣西南獨過里大路

傍有龍崗驛是其遺址○廢永固縣舊志云在城
北不詳其處今縣東南務本里有永固崗城垣基
址猶存疑或近之○廢泅水縣在縣西西水里斥
水渡頭上里許蓋永固在唐開元時省入懷集而
泅水以宋平南漢時省也○古龍涸在黨山大凹
潭深不可測相傳有龍潛其中每風雨時作潭自
有聲歲旱祈禱輒應○上愛嶺與新州四會縣接
壤唐神龍間五祖傳衣鉢與惠能密囑能速去恐
人害之嘗潛至上愛嶺最高峯頭石室棲遲至今
猶傳曰六祖巖長慶年間泅水縣建寺以尊崇之

後寺廢乃于道士巖前重建○道士巖卽花石洞也晉葛洪字稚川號抱朴子嘗遍遊名山過涪水縣覽花石洞遂居之采覓丹砂及金鵝蕊諸藥丹竈中鑄抱朴二字水清黑蹟隱隱尚存後人遂以道士名巖○明廣文黃宣遊花石巖賦辭采駢麗余采之云於爍懷陽秀石峙嶸盤錯蒼梧枕轡交粵挺玄黃之麗象跨嶺海而橫越乘標引峯連縣喝噶體爽磴以屹嶮紛郁郁以纒列或靠嵬兮而岸峇或塘岬兮而嶰嶰或巖岑兮蒼刺以參差或璘响兮嘒嶠而斷絕或下平行而曠蕩或上哈呀而截薛于東則青江洄瀾蕩其胸于南則赤水洑湫涌其穴其巖則有四門洞矚從橫崎嶇鬼嶮怪啐儼若天闕芝房無以參閭風不能劣于前則有冲天石竇上泊玄幽炫耀虹蜺于斗射牛雲鳥穿飛曾莫知其攀遊於旁則有坂坻嶺岈而成嚙狀若藻蓮猗狎太華競秀爭妍游女弄竒于若邪之曲耕父揚光于清冷之淵於右則有北面齊嶽雙峰峻崕隆崇歸嶠豐冠山之朱堂盤紆玲瓏儼員嶠之瑯室爾乃開白雲之庄披素書之帙簾簾雲幌霏霏映日圓地生明曲若新月邈乎哉洵宜望

之無際恬矣哉蓋流盼而靡一至若青冥迴薄魏
魏銀表道人兮羽化雲女兮嫵媚金鵝石魚兮時
不散龍鼎玄珠兮沈不曉淒乎雲淹兮神何竒溢
乎水滴兮澤奚小爾乃登嶢嶢覽遐逖披巉巖眺
諸石則有央若奔驟類天馬之騰空蜿若游龍儼
巨鰲之立極或前橫若削而筆聳或後赴若敵而
劍擲或蒼翁若雲門而綏隼或覆若洪鐘而仆仄或
連若累空而輻輳或散若蹲踞而遠埴美哉茂麗
臨望廣矣竒矣衆備難覩記矣于是乃列寺營址
棲樓于後東西膠葛南北駢複雕栾鏤采異出竒
構於是乃崇其表剝金彩玉璞施不捨之壇結無
緣之閣掩室摩竭演勿照之真明杜口毗邪通息
言之妙覺夫然後九衢之草千芳四照之花萬灼
崖谷共清地景交遑于是同塵并井都人女士袿
服靚粧雜沓雲纒躡臯巒以馳驚蕩神情之曠美
恨百年之迅度日豐容之難似追穹輿之無盡識
蜉蝣之幾遇于是有朱輪鼎貴僭從奕奕陳詩采
風飛觴舉白澹忘懷乎紛務暢游倪于瞬息於是
有玄真之子輕妙之容攀雲魏之石室尋霞舉之
仙鳥仰葱翠以延脰恣遨遊以高適此則花石洞

之梗槩世得爲雄羨者也若夫悟暉韶而葉綺感
豔節而花燃雜好鳥之流聲釋機情于魚筌翫盈
虛於物化揆奧義於瓊篇綠草萋而送春朱櫻荐
而迎憂愛晨風之弄旭厭夜黃之噪夜閑踟躕于
月觀喜澹蕩于風榭搜泐瀟以魂搖托沈騷而賦
寫人安得而不懷余安能以自默乎客曰若吾子
之言大都能道其要妙所謂殫究于前聞發蒙于
未覺矣盍爲竟其說焉遂辭曰遼廓萬有天地宅
兮崩芳茲石恢竒怪兮鴻荒無傳誰斧鑿兮巖巖
具瞻洵俯仰兮苞光靈曜施莫厚兮必有偉人代
相符兮斐詞知謬美贊侑兮○又有李瀚者亦廣
文其詠南谿古渡詩云兩堤楊柳酒帘風去去來
來信莫窮記得南河歸路晚水邊停騎落霞紅又
佛燈晚照詩依約禪關入定鐘佛前燈火隔踈松
山僧深夜渾無寐更借寒光照鉢龍

鬱林州

在府西北三
百三十里

領縣四

本秦桂林郡地漢元鼎六年更桂林爲鬱林後漢
光武二年世祖鬱林太守外卽此魏晉因之梁改
爲南定州隋大業初改尹州煬帝改鬱州尋改爲
鬱林郡自唐已來州郡率無定稱而鬱之名不改

州故治南流縣 國朝以南流省入○谷永漢建
 寧中太守廣鬱古西甌駱所居永以恩信招降烏
 潯人十餘萬開立七縣○吳陸績為鬱林守歸舟
 輕於岸上取巨石壓之人稱曰陸公鬱林石在今
 吳郡之婁門陸龜蒙家居臨頓里其門有巨石即此
 ○毛靈晉泰始七年守鬱林壯勇慨慷為吳將陶
 璜所執不屈而死後人立祠祀之○劉宋太守劉
 勔至郡珊瑚連理生勔聞于朝為大明七年正月
 ○王安中字履道中山人宋靖康初以尚書左丞
 論時政謫鬱林子孫因家焉○元文升宋末丞相
 天祥弟璧之子也信國死難以升為嗣後仕元海
 北燕訪使卒葬于此州之八疊岡子孫遂家於鬱
 今有文丞相祠其裔諸生文運熙者尚藏 國初
 解學士縉書公上巳詩以貽燕訪子良錫云○圖
 經信石山在州東南二里一名牢石坡坡上夾石
 側豎如鐘唐置牢州以此每歲秋期鄉人共候此
 石若有雲氣覆之歲必大稔○石柱坡在州南三
 里柱高二尺相傳馬伏波立又七里為兩道嶺峰
 嶺稠疊博陸二縣經由此分○寒山在州北二十
 里九域志云越王陀遣人入山採橘十日方回問

其故云山中大寒不得歸故名○荔枝山在州東南二十里山出荔枝夏月熟時如錦屏障○隱仙巖在州西二十里石室幽邃壁上題元和十四年來遊七字附近爲黃都山九域志云昔有樵夫入山迷路見黃衣冠者五人語之曰吾都此山者也故名○水月巖在州東南二十里洞中虛明石乳凝結如琅玕倒垂澗水從巖中流蕩漾激石遵澗行爲陰洞遊必列炬跨木渡澗數十步水石益竒削爲芙蓉伸爲仙掌渦盤柱立翔飛疾馳無所不有又出洞西南行板緣而上有一峯拔起草木森蔚洞在其腹是曰天馬洞洞中有馬蹄跡莫紀其數直入石二三寸許又有釣天洞分上下二界卽天馬西峯也下洞涉潭水始至臨潭有二石扣之作金玉聲上界軒豁可布十筵坐聽考鐘擊石琅琅如鈞天之奏已拂日光矣溯其初入洞兩山欲合未合之間上露一道天光晻晻如昧爽初曙澗流紆折與之相應又別自一世界也○南流江在州之左南流縣以此名源出大容山會綠鷓水西南流十餘里八疊縈迴過羅望江至廉入海江濱有巨石如伏犀石間二竇水各湧出合爲一派迴

數十步入江宋嘉定十六年忽湧紫水因名紫泉
○五龍潭在州南三里其水甚深色如靛旁有石
壁狀如雕鏤○司命井在鬱平廢縣縣即唐麟德
初所析置也南越記云縣有石井其淡半之可給
闔境不竭又其南有石室皎潔明朗中有石人像
中一石床可坐百餘人○郡國志云馬援造銅船
一旣歸付程安令沈於渚天晴水澄往往望見船
樓上恒似有四寸水不知幾十丈許○顧微廣州
記云鬱林郡東南山上有池池有石牛百姓祈雨
殺生牛以牛血和泥泥石牛背祭畢即大雨洗石
牛背泥盡乃晴又有西甌池在郡西越王遣甌脫
淬劍于此晨夕常有煙氣今西甌驛沿其名○南
史齊武帝乘龍舟遊江中絰越布爲帆結綠絲爲
帆縹以鍮石爲足榜人皆着鬱林布作淡黃袴舞
估客樂按今鬱林葛南方稱爲佳物機誕而縱長
五六丈然質頗重厚似不甚宜暑原貢額不載萬
曆十五年始令貢千疋已又令貢二千疋工部覆
奏定每歲百疋頃內監教之織爲龍鳳紋以獻
今上登極敕止之○金石畧云後漢鬱林養奮碑
字叔高和帝時舉方正碑以初平四年八月立○

唐鬱林觀東巖壁上崔逸八分書併撰文開元七年正月立

博白縣

在州西南七十里

本漢合浦縣地唐武德四年析置南州并置博白縣六年改南州曰白州仍以縣隸焉宋開寶五年廢白州以博昌縣隸蕪州七年復置白州紹興六年廢州爲博白縣隸鬱林至今因之○衛公山在縣東十里有靈應侯壇相傳卽李藥師也其側爲洞房山高廣玲瓏綴乳丹碧麗若雕房宋劉子羽謫居時置有尋山堂今廢○雙角山在縣西十五

里雙峯角立綠珠江發源于此又十五里爲綠羅山其下有綠珠村○將軍洞在縣南三十里洞有三重石室虛明中有石田石龍石廩有溫涼泉分爲二派而流石壁上刻南州太守領將軍龐孝泰十字○伏割山在縣西四十里鸚鵡孔雀諸禽多出其中下爲伏割村○金魚山在縣西南五十里舊傳曾產一角羊于此山下有石井深十餘丈多金魚○又十里爲宴石山北岸臨江中有二石流泉潰激崖宇虛曠峙于其巔寔宇記以爲南越王宴坐處○飲馬江在縣南一里漢馬伏波南征飲

馬于此○綠珠江在縣南七里嶺表錄異云白州界有一派水出自雙角山合容州江是謂綠珠江昔梁氏之女有容貌石季倫爲交趾採訪使以真珠三斛買之梁氏之居舊井存焉飲者必誕美女宋徐噩綠珠渡詩早出綠羅村晚過綠珠渡日落白州城草芳梁女墓江水流古今滔滔不相顧今人不見古時人依舊青山路如故○南漢時博白有遠村號綠含者皆高山大樹人跡少至斗米僅值一二錢以深邃險峻不得出也村民嘗自謂其山多鳳大如鵝五色有冠而尾甚長率居大樹之巔晴明則雙飛而出所過諸鳥斂翼俛首伏不敢鳴者久之又宋景德間白州有三鳳自南來飛入城中群鳥隨之至萬壽寺前棲於百尺木龍樹上身長九尺高五尺備五彩冠似金杯此二則見西事珥○唐龐孝恭少以忠義自許龍朔中由武功歷左驍衛將軍遼東道行軍總管戰歿于陣○李時亮字端夫宋嘉祐中進士累官散騎常侍兼御史大夫亮善屬文尤長于詩與同官陶弼相賡和有詩曰李陶集已上俱博白人○蔡條叢記云博州城西有新村吾叟杖其間至一舍旁見兩老人

坐飲迺兄弟也大者年九十四顧謂曰此吾幼弟年七十八矣從旁環拱而立者皆老人之曾孫殆可入畫圖也

北流縣

在州東四十五里

本漢合浦縣地晉析置勾漏縣唐武德初改置北流屬合浦郡舊唐志云州所治也隋大業初以陸川縣地入焉唐武德四年析置豪石宕昌南流陵城新安五縣貞觀十一年省新安後又併豪石宕昌俱省元和郡縣志云北流縣在州郭開元中移於今理○縣學唐貞觀三年建在登龍橋西元大

德二年遷于寶圭驛至正間始遷今所○金龜山在縣東二里口吻尻足皆具遠近視之無不駭爲直者與會靈臺隔江相對亦高山也上有瀑布巖洞○梧臺山在縣南天門山在縣西與穿鎮公界諸巖爲縣西南之鎮○勾漏山在縣東北十五里平川中石峰千百矗立特起其巖穴多勾曲穿漏故名山有靈寶觀觀東有龍潭洞冷襲毛骨觀後二小洞南向者曰太陽北向者曰太陰由觀後西北行即勾漏洞洞前俯瞰有橫塘石室室東爲寶圭洞秉燭而入丹竈床几盤壺碾臼皆石乳自然

疑結而成約半里許水涯循梯直下攀竹筏而行
 歷甕門三四重間關委曲窮水際益廣益奇矯首
 見一點煙如長虹出天表蓋石罅之容光也捨筏
 躡梯板躍而上其中一室曰蟠桃深三四百步仰
 視高處杳不見頂其西小室明朗連榻周遍可踞
 可卧是為道書第二十二洞天按北流志云晉葛
 洪為勾漏令嘗於寶圭洞脩煉成仙雖州志云洪
 句容人聞交趾出丹砂遂遊羅山寺脩煉丹
 成復遊勾漏歷羅浮以去廣州志云洪將之勾漏
 至廣州刺史鄧嶽留之不聽去止於羅浮煉丹忽

與嶽疏云當遠行尋師嶽急往別及至洪已兀然
 而逝蘓子瞻與王定國書云葛稚川求為勾漏令
 而竟化於廉州其說不一如此晉中興書云洪亡
 時舉屍入棺輕如空衣豈其屍解於羅浮而復遊
 於勾漏耶西事珥云勾漏洞天四面石山圍繞
 其中忽開平野數里洞在地上不煩登陟外微敞
 豁中有暗溪穿貫而入與北流水合結小桴坐其
 上命篙師撐之詰曲而行水無底兩岸石如虎豹
 獠獍森然欲搏行約里許仰見一大星爛然細視
 乃石孔透天光也洞對高崖上夏時望見荷葉田

田然峻絕不可到土人云或見荷花則歲大稔口
寶圭洞即勾漏正洞石室中有玉宸道君及葛真人
石像五季時迎自南海者遊人躡梯攀蘿曲磴
飛棧如瑤階玉埒小石細碎羅列如杯如筓又如
楊梅荔枝充滿架壘莫可名狀轉仄僅容跬步直
穿太陰洞後出山腹乃寶圭之東洞中室曰蟠桃
廣三四百步仰視高處不見其頂西小室洞朗外
矚自然石榻平鋪疊架可眠可踞與東洞對正如
兩掖○白砂洞縱廣一頃高數十仞石膏玉英散
彩流光下有澗井數處皆舊時採砂之坎凡砂生
於此其色獨白故名洞西有韜直觀石碣記云南
漢時中官棟君所經營左右二石室深四五尋石
床相對隆冬亦溫其上重重如層樓複閣與溪澗
映帶有石窟高深皆丈餘韜直觀傍有玉虛洞洞
中物象瑩潔如玉雲從洞出則雨風從洞出則霽
玉虛洞之下有巫山寨規圍二頃絕壁千仞十有
二峯四顧一圍間以尖峰懸崖巘岼韜直觀之西
巫山寨之北有玉田洞洞闢二門其盤石皆翠碧
色平夷通明可以偃仰其膏乳悉具物象緣石棧
行百步傾身而入乃至石田數丘石花如玉田中

積水無間冬夏不溢不涸出洞而南半里至玉田
寨高十餘仞其深莫測北流爲二池中有小島水
潛通江時有大魚逆流而入去韜真菴五里有普
照巖山如覆釜洞穴當其胸入洞仰視不可階升
而其中仙壇寶塔低昂交錯幢幡羽衣獵獵飛動
巖西有獨秀巖孤峙平野之中石室廣六丈高倍
之虛曠平夷可容數千人石乳掛壁上儼如西方
佛像○綠藍水出綠藍山其流有二一經廉州入
海一經容縣至番禺入海有橋曰落桑跨綠藍江
去縣東二十里○銅鼓潭在縣北二十里昔有銅
鼓浮水而出擊之聲駭村落至暮復沈水中 本
朝景泰三年其鼓復出舟人獲送本縣譙樓至今
存○馬門灘在縣西南四十里漢馬援南征以江
流迅急鑿去其石餘二巨石雙立爲門其中流水
如奔馬故名○北戍灘在馬門灘下唐高駢爲安
南都護平蠻北歸患其湍險屬防遏使楊陵疏濬
之○鬼門關在縣西十里兩山相對間濶三十步
馬援討林邑蠻路由於此立碑石龜尚存往來交
趾皆由此關其南尤多瘴癘去者少得生還諺曰
鬼門關十人去九不還我 洪武初敕改爲桂門

關宣德中改天關唐沈佺期詩昔傳瘴江路今到
 鬼門關土地無人老流離幾客還○明解縉上北
 流一絕句竇家寨前朝雨晴思羅港內水初生楊
 梅菓熟春欲暮豆蔻花開鳩亂鳴又金鷄驛前津
 吏迎金鷄巖下江水聲金鷄飛上九天去惟有空
 巖餘舊名

陸川縣

在州西南
七十里

本漢合浦郡地隋置陸川縣大業初廢入北流縣
 唐武德四年復置宋會要云開寶七年廢順州省
 龍豪溫水龍化南河四縣入焉九年移治公平淳

化五年復徙治溫水元屬容州 國初洪武四年

改今屬○後陽山為縣所据群峰疊嶂起伏不齊

○東山去縣八里高二十丈中有泉水南入鈔洞

具下為金砂溪○文龍山在縣東北十五里山下

有水流遶縣前○雙龍山在縣西南二十里山高

百仞雙瀑流注即古龍豪縣治也○鳴石山窳宇

記云董奉既死人見於鳴石山山海經云長石之

山洪水出焉山多鳴石即此○石袍山方輿記云

山多竹木莠心翠如袍山有肉翅虎下山食人食訖

即飛還絕巖○白羊山山色潔白四面懸絕上有

飛泉下有勾芒木可爲布○交黎山在縣南產黃
白藤及多鵬雉蚺鹿有水滌洞凡九十九渡○六
穿石在縣北壁立如碑高丈餘上穿六孔○簫韶
山九域志云嘗聞音樂於此○崑崙水在縣東水
中有石似崑崙下流經廉州入海○平南水在縣
南二十五里合龍化江流入伏波灘

興業縣

在州北
六十里

舊唐志云石南縣州所治也梁置定州陳天嘉中
置石南郡於此隋開皇十年改郡爲石南縣唐麟
德二年析石南置興業其後因之○萬石山在縣

西四里峯巒錯落如累石然其下有石井流澗詰
曲土人修禊於此○東斗北斗二山俱在城外十
里東斗之外又有東山山上有泉從石飛下百餘
仞望之如翔鸞舞鶴舊建有飛泉亭今廢○綠陰
山在縣南十里有木如榕大蔽數十畝一名饒山
鳴水江遶其下○翻車嶺在縣北二十里龍母江
之源也險峻難行車轍易倒故名○鐵城山在縣
南十五里周圍巖竅皆鐵色其中平行容數百家
外繚石壁險固如城上多石竇泉流不竭山有四
門惟東首可通人行南門有土基相傳爲古敵樓

西北二門多石艱阻圖經云石用郡縣舊設於此
 宋至道二年移治南流山北一里有古州巖廣數
 丈巖中有潭四時不涸又東入一竇有石懸下如
 鐘扣之鏗然石壁間有元和十四年來遊等字○
 白馬巖在縣西十餘里遠望如馬其中深廣可容
 數千人又有三四小洞幽深莫測上透天光○牛
 龍巖在縣南二十里中可容千牛每冬寒則居民
 驅牛入巖以避又有龍蟄於此○元至正間興業
 大李村有姓李者素好脩煉一日與妻自外家酣
 飲回至途中忽謂妻曰我體癢甚須過前溪一浴
 汝姑待之少頃風雨驟作妻趨前視之則遍體鱗
 出矣囑妻曰我歲一來歸當以米糕祀我語畢歛
 然變為龍騰空去後果歲一還其里里人禱之雨
 澤霑足禾稼豐稔人呼其宅曰李龍宅

廣西名勝志卷之四 終

廣西名勝志卷之五

閩中曹學佺能始撰

柳州府

在省城西
四百里

領州二縣十

以地當柳宿也唐貞觀八年改自南昆州者本漢鬱林郡之潭中縣地孫吳析置馬平縣梁大同三年八龍見於江乃卽江南置龍州及龍城縣故唐天寶元年改爲龍城郡矣至乾元始復柳州○唐元和間刺史柳宗元登柳州城樓寄漳汀封連四州詩城上高樓接大荒海天愁思正茫茫驚風亂颭芙蓉水密雨斜侵薜荔牆嶺樹重遮千里江

流曲似九迴腸共來百越文身地猶自音書滯一
方魏澹西事珥云泔河水旣與龍融二江合過柳
州宛轉環遶如壺城蓋水北來還轉向北東處如
壺之領域則居其腹也柳山迴互交錯而水從之
所謂江流曲似九迴腸者以此○柳江在城南一
名潯水源出懷遠流經象州歷潯梧至廣東入海
柳子厚詩柳州柳刺史種柳柳江邊談咲爲政事
推移成昔年○東亭在江南岸柳宗元記畧云出
州南譙門左行二十六步有棄地在道南南值江
西際垂楊傳置東曰東館其內草木猥與至是始
命棧制蠲䟽樹以竹箭松檉桂檜栢杉易爲堂亭
峭爲杠梁下上翺翔前出兩翼憑空拒江江化爲
湖衆山橫環嶮闊澗灣當邑居之劇而忘乎人間
斯亦竒矣○相子堂在城西柳宗元種柑於此其
詩曰手植黃柑二百株春來新葉遍城隅方同楚
客憐皇樹不學荊州利木奴幾歲開花聞噴雪何
人摘實見垂珠若教坐待成林日滋味還堪養老
夫○集古錄云柳州文宣王新廟碑唐元和十八
年八月立刺史柳宗元撰文○羅池廟碑昌黎韓
愈撰文其畧云羅池廟者故刺史柳侯廟也柳侯

爲州三年柳民旣皆喜悅嘗與部將魏忠謝寧歐陽翼飲酒于驛亭謂曰明年吾將死而爲神後三年爲廟祀我及期而死三年孟秋侯降於州之後堂歐陽翼等見而拜之其夕夢而告曰館我於羅池廟成過客李儀醉酒慢侮堂上得疾扶出廟門而死明年春魏忠歐陽翼使謝寧來京師請書其事於石○孔溫裕宣宗時爲補闕以諫討党項羗謫柳州司馬○劉菁字去華嘗對策文宗極言宦官之禍因得罪貶柳州司戶叅軍卒於柳李商隱有詩哭之菁墓在城西五里 國朝桑悅字民懌

以調柳州倅不欲往或問之曰宗元小兒久擅此州名徃一日掩倨其上不安爾悅弘治間吳人

馬平縣 附郭

釋詳郡下向爲柳州治所宋咸淳初曾徙治于柳城之龍元 我朝復還馬平○唐戴叔倫過柳州詩地盡江南戍山分桂北林火雲三月合石路九疑深暗谷隨風過危橋共鳥尋羈魂已愁絕不復待猿吟○柳河東集有柳州山水近治可遊者記云古之州治薄水南山石間今徙在水北直平四十里南北東西皆水匯北有雙山夾道蘄然曰背

石山有支川東流入于潯水潯水因是北而東盡大壁下其壁曰龍壁其下秀石可視南絕水有山無麓廣百尋高五丈下上若一曰甌山山之南皆大山多竒又南且西曰駕鶴山狀聳環立古州治負焉有泉在坎下常盈而不流南有山方正而崇類屏者曰屏山其西曰四姥山皆獨立不倚北流潯水瀨下又西曰仙奕之山山之西可上其上有穴穴有屏有室有宇其宇下有流石或形如肺肝如蜂房或楫于下如人如禽如器物甚衆東西九十尺南北少半東登入小穴常有四尺則廓然甚大竅中黑燭之高僅見其宇皆流石怪狀由屏南室中入小穴倍常而上始黑已而大明爲上室由上室而上有穴北出之乃臨大野飛鳥皆視其背其始登者得石枰於上黑肌而赤脈十有八道可奕故以名其山多櫛多櫛多篔簹之竹多異鳥雀其南有石魚之山全石無大草木山小而高其形如立魚有穴類仙奕入其穴東出其西北靈泉在東趾下有麓環之泉大類轂雷鳴西奔二十尺有洞在石澗因伏無所見多綠青之魚及石鯽多條雷山兩崖東西雷水出焉蓄崖中曰雷塘能出雲

氣作雷雨變見有光禱用俎魚豆彘脩形糝糝虔則應在立魚南其間多美山無名而深峨山在野中無麓峨水出焉東流入于潯水○按峨山距城西三里一名深峨山有雙瀑布飛流如鵝亦名鵝山宋陶弼詩鵝山夏曉雲漫郭龍壁春深水遶村○立魚山在江南岸里許以形似名山半巖洞玲瓏前一巨洞左右二門通後二洞高廣明潔如堂房可供遊宴山足有潭名小龍潭中多魚與大江通江水消漲此潭隨之又里許爲屏山以其方正類屏爲甌山以其突圓類甌又二里爲雷山兩岸東西大山相向南有飛來廟最靈廟下深潭名大龍潭柳子厚有雷塘祈雨文○仙奕山在城西南詳柳記中又次爲駕鶴山旁臨大江聳掛如鶴古州治之所辰也又次爲新洞山與鵝山相對有洞可坐百人石乳融結以杖觸之作鐘磬聲○背石山在城北十里其東山曰桃竹西曰雀岡俗名夾道雙山○龍壁山在城東十五里石壁峭壁下臨大江郡城之下關也有洞曰關洞距城八里○柳江卽城南江經江口鎮合相思埭永福雒容之水下潯州與鬱水合是曰黔江○白蓮池在北關外

池有九竅泉出其中又城北隅有井柳子厚為之
銘沈傳師書見金石錄○陸道仙泉在城東南十
里仙巖之麓相傳有陸道人者脩煉于此巖洞玲
瓏泉流不竭有古詩刻甚多○仙人跡在城東北
十五里有石平地突出周半里許上有巨人跡二
相傳鍾呂二仙所畱按志城南亦有仙跡山其麓
有大雲寺唐初建後燬于灾仍脩復之柳子厚有
復寺記見集中○西事珥云 國初洪武間馬平
主簿孔性善言溪峒蠻雖常亂擾亦有良心昔陳
景文為令獯獷皆應差役厥後撫字乖方始仍反
側誠使守令得人示以恩信諭以禍福亦當革心
向化 上嘉納其言命吏部凡臨溪峒郡縣擇賢
守令以撫輯之此事柳志不載令簿皆逸其名

雒容縣 在府城南
六十里

唐貞觀初析潭中縣置宋南渡後遷于洛清鄉
國朝萬曆四年以縣屢被山賊焚劫因徙上羅鄉
之嘉祿村為今所○按雒清江在縣南半里自桂
江分流經縣界至郡城三江口入于柳江縣以此
名○舊縣西十里有龍鼻江發源托定雒斗鄉流
入雒清江○會仙巖在縣南白象巖有石鐘鼓擊

之鏗然○思微山去舊縣里許上有泉穴四時不涸屏石山在舊縣西北十里下有泉岷水出其中○如來山在縣南十五里高聳峭拔相傳有神女降於此

羅城縣 在府西北百九十里

本桂林之玖州洞地宋開寶中置屬融州熙寧中省入融水縣我朝洪武初復置屬融州十年州廢改今屬○東黃山在縣東有巖曰淵秀○鳳凰山在縣北二里又八里為覆鐘山俱以形似而名○永山在縣西北四十里其上高寒四時常冰又四十里為葵山以形似之或謂其產多葵故名○石硯山在縣西九十里聖水發源於此○武陽江在縣北界有二源一自高懸里出一自平西里出皆至武陽寨合流入沙拱江

柳城縣 在府北七十里

亦漢潭中縣地梁置龍城縣宋景德年改柳城○按張維廣西郡邑志曰梁大同二年八龍見於江乃即江南置龍州及龍城縣隋開皇初徙治江北州尋廢至元移龍江東我朝因之○青鳳山在縣西二里高百餘仞上有一竅通明亦名穿山○

烏蠻山在城東南二里高聳臨江下有深潭澄湛
徹底以其山石純盧故名○勒馬山在縣北三里
舊縣治處○銅磬山一名雲蓋山在縣西十里高
大峻聳雲霧常覆其上○筆架山在縣東十里尖
銳而秀故名○觀音巖在縣西北回環相通西有
臨西閣北有丹霄亭南有石田石盆池巖東有會
仙巖巖中有仙人跡丹爐○龍江在縣西源出慶
遠與融水合流來會柳江○湧珠泉在城西七十
里自地湧出市中相傳諸葛亮孔明南征過此馬
跑其地其泉湧出故又名馬跑泉

懷遠縣

在府北三百一十里

本牂牁夜郎之境宋至和中置王口寨崇寧四年
因王江古州蠻納土賜懷遠軍尋改為平州仍置
附郭懷遠縣 我朝洪武十年州縣俱廢以縣置
三江鎮巡簡司十四年復置縣○按平山在縣北
五里宋建平州以此一名屏山其下為治平洲廣
數百畝可以耕種○今縣在丹陽洲即古丹陽鎮
也蒼帽山在其北珠玉山在其南天馬山在其東
掛榜山在其西又北為大桂山再遠為唐朝山與
湖廣通道縣界○九曲山在下石門其山巔處高

萬仞怪石巖巖中有一泓碧練千尺○石門山有
四江左右兩山夾峙崖石峭豎若門古州江出黎
平古州合容江及靖州諸水至縣○板江在縣北
界源自扶勞山出牛頭上甕經邊田入大江○焦
花江在縣北二十里源自蕉花村至江口入大江
又十五里爲田寨江源出吼江北原經田寨播營
丹竹入大江又三十里爲西波江源自白雉山入
其邊江會合水江○四里江自大理馬平經白花
古利龍塘入潯江○斗江水自江源大地入潯江
○大融江古州清水江之水出焉卽舊縣西北大
江也

融縣 在府西北二
百五十里

隋置融州唐天寶初改融水郡其城卽天寶時築
東臨融水矣乾元復爲融州俱以融水附郭 國
朝改州爲縣省融水入焉唐柳宗元詩荒山秋日
午獨上意悠悠如何望鄉夕西北是融州○獨秀
山在縣西一里挺然秀發上干雲霄又里許爲旗
山勢稍衍迤香山廟樓其麓舊有香山驛宋元間
遷學宮處○老人巖在縣西南四里舊傳有老人
拄杖悠然其上故名疊巘隆起度高千仞山腰削

壁忽開巖竇朗明軒豁登自山後石徑縈紆而上
屢憇乃至臨巖一眺俯視萬家雲際諸山如在几
榻○玉華巖在城西北四里巖間有一石蹲踞如
虎昂首而上驤又一石蜿蜒垂首而下盼俗號龍
吟虎嘯者以此○劉公巖在城南四里舊名西峯
宋紹定間郡守劉繼祖命報恩寺僧知性闢之祛
碍剔穢豁然虛明因以劉公名○德巖即彈子巖
也在城西五里玲瓏崆峒潤四五丈高如之內產
石子如彈因名○真仙巖在縣南六里仰視高遠
青白錯雜靈壽溪出焉泠泠清響作環珮聲中有
白石如天尊像舊名靈巖山又名老君洞宋咸平
中改爲真仙巖頒太宗御書百二十軸藏於內張
孝祥磨崖大書天下第一真仙之巖八字又有宋
元祐黨籍碑巖背里許平地中有二潭相連大者
數十畝小者一二畝水色紺碧中多靈產名安靈
潭○雲際山在縣北十里甚高峻上有翠玉寒碧
二泉山頂出雲多雨雲淨則晴近西爲石門山背
江兩山夾峙崖石峻削如門狀土人謂之上石門
在縣下者謂之下石門○銅鼓山在縣西南二十
里舊傳諸葛武侯散埋銅鼓以服蠻獠後有得于

廣西各州志卷之五
是山者山下爲銅鼓灘○採藍洞在縣東北二十里四面青山護列洞中平地如砥石上有硃書採藍洞三字○鐵船山在縣西三十里遙望髮髯第一船尾插絕頂巖間又有仙女泉以七月七夕嘗有仙女浴于泉側○聖山在縣北四十里長安鎮高七八里上有廟祀虞舜因名近東爲四盤嶺上下二十餘里嶺道縈紆○寶積山在縣東五十里產鐵及盧茸石近北爲天堂嶺上有一泉長流不竭登板飲者以爲天堂也○潭江合縣保江浪溪諸水與龍江并入于柳○保江出縣北杲村至魚樓浪溪江出縣大段村至長安靈壽溪在縣西南出六村背江在縣北流經羅城俱入于柳○覃光佃融州人宋開寶六年進士爲監察御史彈劾不避權貴京師呼爲真御史○張守約濮州人歐陽修薦其習邊事權知融州峒將吳儂恃險爲邊患悉捕誅之後脩復薦可任以將軍因詣闕條利害多所見納

來賓縣

在府南七十里

唐志嚴州下注云乾封二年招致生獠以秦故桂林郡之嚴州置來賓循德歸化三縣宋朝會要云

開寶七年以來賓縣隸象州按至我朝始改今屬○白雲洞在縣北二十里洞至深邃常有白雲籠罩其上○石牙山在縣南三十里平地有石峭拔如象牙又三十里爲金峯山方輿勝覽云山有寺大石當其殿前寺僧禱于雷神欲去此石忽風雨晦冥頃之開霽則石已移在山中宋有佛日禪師金華開山第一祖也○思玉山在縣北四十里舊經云昔人有得玉于此山者再來求之不得因以名○居松山在縣南四十里山有石門有自然石盆夏生蓮花嘗有魚戲盆中又十里爲穿山其山有穴南北相通相傳馬伏波時獲白鹿於此○瑞象山在縣西瑤光臺記云郡之西山聳秀葱翠四時寒暑陰晴變態不一當其天宇澄霽條爾溟濛紅日朝暎遊雲間出悉爲白象之形宛若生成奔逐飄逸於西山之上○雙泉巖在縣西北嘗有士人讀書巖中而患無水忽一日雙泉湧出濶丈餘夏涼冬溫○武禪山在縣境昔時有武志士者脩煉于此每出赴人齋供則架青布幕爲橋去五七里遠至市廛宋皇祐初白日上昇○大江在縣南發源遷江縣都泥江流合柳江梓水自牂牁

來注之元和郡國志云巖州有長水自牂牁流下
來賓卽此水也○古郎城在縣東南五十里九域
志云在古郎山蓋以山得名周迴一里○廢武化
縣在縣境唐初置屬封川後屬象州宋時廢

象州

在府東南一百三十里

領縣一

漢武帝平南越以桂林地置鬱林郡而秦之象郡
更名日南今象州卽鬱林郡之中潯潭中二縣地
也陳置象郡隋廢郡置象州至今仍之○象山在
州治西山多出雲其上有巖白石如象象州之名
本此○鳳凰山在州東二里與東岡山相連○燕

子巖在城北巖中空洞可容千人群燕巢棲于此
其下有碧潭亦名龍潭山○白面山在州南七里
石壁橫截大江如白面然又三里爲鷺鷥巖一名
鷺鷥峽其上有石約四尺許扣之如鐘鼓聲呂景
蒙名之曰石樂○居鹿山在州東北四十里上有
鹿池舊經云天欲雨輒先有雲如鹿起于池中○
獨傲山在州南五十里舊名天蓋山宋乾德間邑
婦獨孤氏與夫妹傲氏採葛山中飲泉見有雙鯉
戲水傲氏取之身陷其中獨孤氏往救亦陷俄無
形影月餘在室中呼其父母曰吾二人乃仙女因

有過謫於人間今當還故來辭耳衆咸異之呼爲獨傲仙女亦以名其山○濮泉在州東四十里松檜森羅水石交映州人遊賞之地其上爲石牛山山多怪石常有雲霧蒙罩天色晴霽儼然牛像頭角俱全○又二十里曰雷山莫休符風土記云天欲雷雨則此山先有雲霧又四十里爲聖塘山高峻懸絕昔有藤根垂地人或攀藤而上有一池水清冷可愛魚鱉遊泳桃李樹環遶之且多猿猴及藤爲風雨折去人跡遂絕○象江即柳江也經州城西而州東七里有七里江出天堂嶺入于象江

○滎陽鄭璠自象江得恠石六其二聳而上銳又一如世間道士存思圖人肺胃肝腎次第懸絡又一空而隱外若癭癘殃疝病不好物者又一色緝冰而理平漫彈之有好聲璠爲象江守三年後還長安無家寄止人舍下計輦六石費俸錢六十萬璠嗜好有意極類前輩人李義山記之○象州清規院池中有龍居焉寺鐘常夜飛入水與龍鬪勝而歸則聲振林木偶一夕不回僧往視之見龍蟠踞鐘上寺隨廢水落清徹猶見其影○王世則永福縣人宋太平興國八年狀元淳化初直史館以

言儲貳事忤旨出知象州有惠政及民祀名宦○
象州石橋宋紹興間知州陳太和所築以便民之
往來公字仲容蒲田人州廨闢有率齋學士孫覲
記○國朝象州人呂景蒙弘治間監察御史以直
言謫潁州判後稍起廷評不赴著柳州府志十六
卷藏用集三十卷又有定性發蒙象郡學的二書

武宣縣

在州東南
九十里

本隋始安郡之桂林縣地唐武德四年析桂林建
陵縣南置武仙縣乾封省桂林縣入焉宋元如之
國朝改名武宣○仙人山在縣西十里嶺表記云

古仙人隱此柳宗元詩云寒江夜雨聲潺潺曉雲
遮盡仙人山○仙巖山在縣南四十里巖高一丈
深十倍之可容數百人壁上有仙人影中有泉滴
成乳○石羊山在縣西六十里峭壁上有石如羊
俯臨大江江中石影頭角尾蹄俱全又石上有大
字六行隱約如草書無路可行莫能辨其真相傳
以爲古仙雷題○銅鼓瀨距縣十里昔馬援南征
得銅鼓于此廣化記曰獠人鑄銅爲鼓以高大爲
貴向濶至丈餘者初成縣於庭尅晨置酒招同類
來觀○永通峽一名斷藤峽在縣南三十里接潯

州界民謠曰昔永通今求通求不得葬江中誰其作者噫陳公按即都御史陳公金也詳左江下○宋粟大用年九歲以通五經應童子舉真宗見而奇之補登仕郎○謝洪與其弟澤皆以文學知名時人目為二鳳南遷名賢館于其家者甚衆已上皆武宣人

賓州

在府南百三十里

領縣二

唐貞觀五年置以賓江而名本漢鬱林郡之領方縣也唐至德二年改為領方郡乾元元年復為賓州○領方山在城東一里古郡縣名皆因之今設

學宮處有元淳祐中進士題名碑○仙影山在州城外相傳有二仙女遊此因雷影巖石間舊設解鞍驛在焉宋陶弼詩月斃星冠七大夫遠看還有近還無瑤池侍女雙成道遺下神仙聚飲圖○州南門外圓珠嶺在大江之濱如珠圓抱故名又里許為銅鼓嶺嶺上行人逢逢有聲如銅鼓也又三里為頂山舊傳漢陸賈使越時所經又三里曰武淶山又五里曰南山○葛仙嶺在州西十五里有洞深邃可容數百人宋乾道間知州葛翁葺亭其上左右在馬嶺之傍○與馬鞍山相連者白村巖也

舊傳巖中暗通武緣縣以火燭之乃可行○又五里爲金鷄山舊傳有金鷄飛集其上又二十里爲古漏山泉如滴漏四時不竭州守王舉開浚得之其冽可飲○羅鳳嶺在州北十五里形勢蜿蜒爲治屏障近東曰銅泉山以出銅泉故名○又三里爲石壁山與白羊山相對其側有廖平巖清勝竒絕四圍堅密如城郭宋時廖陸祖者居此○鎮龍山在州東南燈臺山在州西南各八十里極其危聳接南寧永貴武緣上林諸界迤邐二百餘里○寶水在州西南三十里自賓水派合東流出李依江合于柳○李依江源出瑯琊鄉過遷江趨于柳古融州商舶俱于是出○武陵江在州東三十里源出武淶山合浮江水○白鶴泉在州南二十里源出南山至瑯琊鄉通鶯寨泉俱合李依○賓州故城在今城南十里宋開寶間知府楊居政遷置今改賓化鄉○廢領方縣漢置應劭註地里云爲都尉治所按志唐于縣置賓州宋遷至舊城北三十里今廢○楊居政宋開寶中知賓州始創治解築城以衛居民前守蒙延永爲賊所害居政撫其二子買田宅以贖之○梁仲保賓州人也充本州

廣西名勝志卷之五
團練使時儂智高引衆來攻仲保迎戰勝負相持
累日賊衆益集城陷死之後人追傷爲保立祠享
祀不絕也○元楊維禎狄武襄吟賓州海月光團
團劍花火樹燒爛斑將軍如內客未散捷書已
旄崑崙關當時諫官疑武士豈知辨賊遞如此於乎
銅回將軍今豈無世無丞相龐公甘老死蓋詠其
破儂賊事也○宋紹聖中王鞏以蘓軾黨謫賓州
旣歸出侍兒柔奴進坡酒坡謂柔奴廣南應是不
好答曰此心安處便是吾鄉坡因作定風波辭贈
之辭曰嘗羨人間琢玉郎天教分付點酥娘自作
清歌傳皓齒風起雪飛炎海變清涼萬里歸來年
愈少微笑時時猶帶嶺梅香試問廣南應不好却
道此心安處便吾鄉

上林縣

在州北七
十五里

唐武德四年析領方縣置高州六年常厥開拓化
外改南方州貞觀元年改澄州宋開寶五年廢澄
州爲上林縣至今因之縣西南一里有勝業寺即
祠厥者○扶嵐山在縣北五里其山八分矗若扶
欄因建八角仙亭于上又五里爲石光山巖石晶
潔日照之有光○古祿山在縣西七里上有石壇

號仙殿宋雍熙中有盧氏年十歲登山采茶遇仙於此又縣南五里古祿水出焉○思隣山在縣西五里昔有何隣者精道術年百餘歲隱居于此後不知所適鄉人思之故名又里許爲羅勾山以山勢盤屈如勾也又三里爲大明山蜿蜒疊聳中有五峯插漢四時雲霧隱現不常有深潭相傳吐光時照數里又縣東七里嶺上亦有夜光與大明山交映名爭光嶺○鑛鄒山在縣南十里昔人有得鑛鄒寶劍于此故名又十里爲鷄籠山中洞宏濶可容百人○石篷山在縣東南十里平地特起中有巖洞容數百人下有小江穿石縫中水清碧多魚○止輦山在縣東四十五里平地突起圓阜其形如輦上有古木一株亭亭如蓋○智城洞在縣東二十里唐初常厥持節來伏生蠻後隱于此因爲上林人有常敬辯所撰碑存○又三十里曰羅洪山其中有洞宋常旻讀書處旻號白雲先生遇異人有所得章子厚招至象臺勸其勿以榮辱爲念因歸集書一樓閉門誦讀無所不通鄉人以書樓目之象臺卽今州驛所○獅山螺山俱平地特起與羅洪山相向有水出焉曰獅螺江○古淶

山在縣西南五十里古樹叅天遠望葱蔚其下有古淶水○澄江出大明山下入馬波唐以此縣爲澄州治所其名本之黃龍江里仁江化龍江周江皆在縣北其流注于馬波馬波發源茶江流入遷江有章光水淡竹水樊廟水皆合注之○清趣橋在城南門外又數百武爲萬松橋○琴水橋在無虞鄉單竹橋在感化鄉石蓮橋在古淶里皆名之雅醇者無虞鄉卽廢無虞縣也

遷江縣


在州東北八十五里

唐羈縻之思剛州也宋天禧四年改今縣屬賓州

以遷江水爲名○鐘山在縣北一里其下有巖○寶積山在縣東二里疊石崔嵬不通道路頂平可

居○印山在縣西二里上有石盤瀦水盤內時出石魚一雙中有八仙洞下有白石牛身全見而二足隱又一里爲煙合山層巒疊聳林壑深蔚時出煙霞故名○泊艦山在縣北五里其下有巖足容數百人石筍竒甚舟過者皆駐觀之○古黨山在縣西十五里唐書有黨州乃開古黨洞時置又有澄江洞瑤人所居無田而有山畚刀耕火種○潮泉在縣西八十里泉水湧出一日三潮自羅月鎮

入于邕泥江○鷓鴣山在縣南二十里郡志又謂
之白鶴山其下有洞名白龍江水出焉曰龍江縣
西二里有賀水又八里有武節水縣南十里有武
繩水皆流注之



卷之二